

BOSNA I HERCEGOVINA  
PARLAMENTARNA SKUPŠTINA  
PREDSTAVNIČKI DOM

Broj: 01-02-163/99  
Sarajevo, 17.9. 1999. g.

Z A P I S N I K

10. sjednice Predstavničkog doma Parlamentarne skupštine Bosne i Hercegovine,  
održane 17. septembra 1999. godine

Sjednica je počela u 11,50 sati.

Sjednicom je predsjedavao Mirko Banjac, predsjedavajući Predstavničkog doma.

Sjednici je prisustvovalo 29 poslanika (17 sa teritorije Federacije BiH i 12 sa teritorije Republike Srpske).

Odsustvovali su: Raifa Alagić, Edhem Bičakčić, Safet Oručević, Haris Silajdžić, Ivo Mijačević, Sejfidin Tokić, Ljubomir Zovko, Pero Skopljak, Smail Bećirbašić i Vito Rakić.

Poslanici: Pero Skopljak, Ivo Mijačević, Vito Rakić, Ljubomir Zovko, Sejfidin Tokić i Safet Oručević najavili su izostanak sa sjednice.

Predsjedavajući Mirko Banjac konstatovao je da sjednica ima kvorum i da može raditi i donositi punovažne odluke.

Prije prelaska na utvrđivanje dnevnog reda, predsjedavajući je obavijestio poslanike da je početak sjednice kasnio jer su zasjedale radne komisije. Tim povodom je zamolio predsjedavajuće komisija da sjednice više ne zakazuju istog dana kada se održava sjednica Doma. Zatim je pročitao prijedlog dnevnog reda koji je zastupnicima upućen u pozivu za sjednicu i iznio dopune dnevnog reda koje su naknadno usaglašene na Kolegiju Doma.

U diskusiji, povodom prijedloga dnevnog reda, prvi se za riječ javio poslanik Ivo Divković i, u ime Kluba poslanika SDP-a, izrazio nezadovoljstvo što sjednici Doma ne prisustvuju članovi Vijeća ministara. Naglasio je da je to postalo redovna praksa i zatražio da Dom pozove Vijeće ministara da redovno prisustvuje sjednicama Doma.

Povodom navedene diskusije predsjedavajući je poslanike obavijestio da je njega prethodnog dana kopredsjedavajući Vijeća ministara Svetozar Mihajlović obavijestio da iz opravdanih razloga neće moći prisustvovati sjednici, te da drugi članovi Vijeća ministara nisu najavili izostanak.

Poslanik Branko Dokić je u diskusiji rekao da nema primjedbi na prijedlog dnevnog reda, ali je podržao primjedbu Kluba poslanika SDP-a i, u ime Kluba poslanika Koalicije "Sloga", predložio da se kao prva tačka dnevnog reda sljedećeg zasjedanja stavi rad Vijeća ministara u kontekstu njegove odgovornosti i prisustva u pripremnom periodu i na samim sjednicama.

Prijedloge poslanika SDP-a i Koalicije "Sloga" podržao je i poslanik Nikola Špirić. On je u svojoj diskusiji predložio da se pokrene inicijativa za smjenu Vijeća ministara.

Poslije navedenih diskusija, predsjedavajući je dao na glasanje prijedlog dnevnog reda koji je usaglašen na Kolegiju.

Predsjedavajući je konstatovao da je Predstavnički dom, sa 29 glasova za, jednoglasno usvojio sljedeći

## D N E V N I R E D

1. Usvajanje zapisnika 7. sjednice Predstavničkog doma i zapisnika 1. zajedničke sjednice Predstavničkog doma i Doma naroda,
2. Izvještaj Komisije Kolegija o usaglašavanju Programa rada Predstavničkog doma,
3. Informacija o prisustvu poslanika sjednicama Predstavničkog doma,
4. Davanje saglasnosti za ratifikaciju Sporazuma o vazдушnom saobraćaju između Vijeća ministara BiH i Austrijske federalne vlade,
5. Ostala pitanja:
  - a) Informacija o daljnjem radu na pripremi Programa rada,
  - b) Informacija o Odluci Ustavnog suda BiH po tužbi tada zamjenika predsjedavajućeg Predstavničkog doma,
  - c) Izbor člana Komisije o administrativnim pitanjima,
6. Poslanička pitanja i odgovori.

Poslije usvajanja dnevnog reda, predsjedavajući je dao na glasanje inicijativu poslanika Nikole Špirića za smjenu članova Vijeća ministara. Međutim, prije glasanja za riječ se javio poslanik Adnan Jahić, koji je, pored ostalog, rekao da je ovaj prijedlog ad hock definisan i da se u dnevni red ne mogu uvrštavati tačke koje su apsolutno nepripremljene i zbog toga je izrazio svoje nezadovoljstvo. Naglasio je da bi bilo potrebno tražiti izvještaj o radu Vijeća ministara.

U daljoj diskusiji učestvovali su: Nikola Špirić, Branislava Jovanović, Nudžeim Rečica i Dragan Božanić, zamjenici ministara u Vijeću ministara BiH, Zlatko Lagumdžija, Halid Genjac, Ibrahim Spahić, Branko Dokić, Alma Čolo, Ivo Divković i Tarik Čaršimanović.

Poslije diskusije, predsjedavajući je dao na glasanje prijedlog poslanika Špirića, koji je u kasnijoj diskusiji preformulisan tako da glasi - da se pokrene inicijativa za povlačenje potvrđivanja Vijeća ministara.

ZA prijedlog je glasalo 6 poslanika. S obzirom na to da prijedlog nije dobio većinu, nije se ni glasalo po entitetima.

Zatim se Predstavnički dom izjasnio o prijedlogu poslanika Dokića - da se na prvom narednoj sjednici na dnevni red stavi izvještaj i analiza rada Vijeća ministara.

ZA prijedlog je glasalo 19 od 29 prisutnih poslanika.

Prijedlog je dobio i potrebnu većinu iz oba entiteta, pa je predsjedavajući konstatovao da je prijedlog usvojen.

Dalje se Dom izjasnio o prijedlogu poslanika Jahića - da se na prvu sljedeću sjednicu stavi informacija o radu Vijeća ministara od 1. do 9. mjeseca ove godine i obavijesti o toku predstojeće rekonstrukcije Vijeća ministara.

ZA prijedlog je glasalo 9 od 29 prisutnih poslanika.

Predsjedavajući je konstatovao da prijedlog nije dobio većinu, te da nije potrebno glasati po entitetima.

Poslije izjašnjavanja o svim prijedlozima iznesenim u raspravi, povodom prijedloga dnevnog reda, predsjedavajući je dao pauzu, a nakon pauze sjednica je nastavila rad po usvojenom dnevnom redu.

**Ad - 1: Usvajanje zapisnika 7. sjednice Predstavničkog doma i zapisnika 1. zajedničke sjednice Predstavničkog doma i Doma naroda**

Na zapisnike nije bilo primjedbi.

Glasajući odvojeno o oba zapisnika, Predstavnički dom je jednoglasno (24 prisutna poslanika u vrijeme glasanja) usvojio Zapisnik 7. sjednice Predstavničkog doma i Zapisnik 1. zajedničke sjednice Predstavničkog doma i Doma naroda Parlamentarne skupštine Bosne i Hercegovine.

**Ad - 2: Izvještaj Komisije - Kolegija o usaglašavanju Programa rada**

Predsjedavajući je pročitao izvještaj o nastojanju za postizanje saglasnosti, a zatim je podsjetio poslanike da o ovom pitanju nije predviđena rasprava, pa je stavio na glasanje Prijedlog programa rada koji je bio predmet usaglašavanja.

ZA Prijedlog programa glasalo je 14 od 26 prisutnih poslanika.

Zatim je obavljeno glasanje po entitetima. Iz Republike Srpske 10 zastupnika je glasalo PROTIV, a iz Federacije BiH PROTIV su glasala 2 poslanika.

Predsjedavajući Mirko Banjac konstatovao je da su iz Republike Srpske 2/3 poslanika glasali protiv i da Prijedlog programa koji je predložio Klub poslanika SDP-a nije dobio neophodnu entitetsku većinu, te da nije usvojen.

**Ad - 3: Informacija o prisustvu poslanika sjednicama Predstavničkog doma**

Povodom ove tačke dnevnog reda diskutovali su sljedeći poslanici: Mediha Filipović, Ibrahim Spahić, Suada Muminagić, Desanka Rađević, Rasim Kadić, Abdurahman Malkić, Nikola Špirić, Hilmo Neimarlija, Radenka Balta i Ana Havel.

Poslije diskusije Predstavnički dom je usvojio sljedeće prijedloge poslanika Rasima Kadića:

Prvo, da se evidencija o prisustvu poslanika sjednicama Predstavničkog doma svede na 10 sjednica, a da se nastavci vode u okviru jedne sjednice;

Drugo, da se sačini dodatna evidencija o prisustvu poslanika na sjednicama radnih komisija; i

Treće, da se ova tačka dnevnog reda završi bez ikakvih zaključaka, a da u vezi sa prisustvom sjednicama klubovi poslanika povedu računa o svojim poslanicima, a da Kolegij na izvjestan način sve ovo sumira i kada dođe do ideja šta iz toga izvući kao moguće zaključke, da to ponudi na nekoj od narednih sjednica.

ZA navedene prijedloge glasala su 24 poslanika, a 2 su bila uzdržana.

**Ad - 4: Davanje saglasnosti za ratifikaciju Sporazuma o vazdušnom saobraćaju između Vijeća ministara BiH i Austrijske federalne vlade**

Poslanik Tarik Čaršimanović podnio je izvještaj Komisije za saobraćaj i komunikacije o razmatranju Sporazuma, a predsjedavajući Komisije o ustavnim i pravnim pitanjima nije podnosio izvještaj te komisije jer je isti poslanicima dostavljen u pisanoj formi.

Budući da tekst koji je zastupnicima dostavljen nije potpisan, te da se, između ostalog, moglo ustanoviti ili pretpostaviti da tekst na engleskom jeziku i prevedeni tekst nisu

identični, Čaršimanović je upoznao zastupnike da je Komisija za saobraćaj i komunikacije većinom glasova zauzela stav da o ovom sporazumu ne može raspravljati dok ne dobije originalne tekstove.

U međuvremenu je iz Sekretarijata Parlamentarne skupštine saopšteno da je u toku sjednice od Vijeća ministara pribavljen potpisan tekst Sporazuma na engleskom jeziku.

U diskusiji povodom ove tačke dnevnog reda učestvovali su: Ibrahim Spahić, Ivo Divković, Radenka Balta, Nikola Špirić, Tarik Čaršimanović, Branko Dokić i Rasim Kadić. U ime Vijeća ministara govorio je Neven Tomić, potpredsjedavajući Vijeća, koji je poslanike upoznao o detaljima o potpisivanju Sporazuma i predložio da Dom da saglasnost za ratifikaciju Sporazuma na engleskom jeziku, uz zaključak - da Vijeće ministara osigura regularan prijevod na sva tri jezika i objavljivanje u "Službenom glasniku".

Navedeni prijedlozi Nevena Tomića usvojeni su sa 25 glasova ZA, a dva poslanika su bili uzdržani.

Dalje su u okviru ove tačke dnevnog reda diskutovali: Dragan Božanić, zamjenik ministra inostranih poslova, te poslanici: Rasim Kadić, Nikola Špirić, Adnan Jahić, Hilmo Neimarlija, Radenka Balta, Branko Dokić, Nedžad Branković, potpredsjedavajući Vijeća ministara Neven Tomić, Alma Čolo, Ibrahim Spahić i Ivo Lozančić.

Nakon razjašnjenja određenih pitanja vezanih za objavljivanje u "Službenom glasniku", predsjedavajući je zaključio 4. tačku dnevnog reda.

#### **Ad - 4: Ostala pitanja:**

- a) Informacija o daljnjem radu na pripremi Programa rada,
- b) Informacija o Odluci Ustavnog suda BiH po tužbi tada zamjenika predsjedavajućeg Predstavničkog doma,
- c) Izbor člana Komisije o administrativnim pitanjima.

#### **a) Informacija o daljnjem radu na pripremi Programa rada**

Predsjedavajući Mirko Banjac upoznao je poslanike da se Kolegij Predstavničkog doma usaglasio da zastupnicima podnese informaciju da je Kolegij 11.9.1999. godine održao zajedničku sjednicu s kopredsjedavajućim i potpredsjedavajućim Vijeća ministara i da je tada dogovoreno da se sačeka usaglašavanje Programa rada Vijeća ministara najkasnije do kraja septembra. Nakon usaglašavanja Programa Vijeća ministara sa OHR-om Program će u naznačenom roku biti dostavljen Predstavničkom domu, kada će se pripremiti nacrt programa rada Predstavničkog doma, a pri izradi uzet će se u obzir: Program rada Vijeća ministara, dosadašnji prijedlozi Kolegija, te prijedlozi poslaničkih klubova i poslanika.

Predsjedavajući je konstatovao da je ovo samo informacija koju poslanici primaju k znanju.

U okviru ove tačke diskutovali su Branko Dokić i Tarik Čaršimanović.

Poslije diskusije predsjedavajući je dao na glasanje prijedlog poslanika Dokića da se iz dijela Prijedloga programa usaglašenog na sjednici Kolegija sa predsjednicima poslaničkih klubova i poslanicima koji nemaju klubove prihvate tačke B, C, D, E, F, te da se dodaju novi stavovi tako da se kaže da će Predstavnički dom Parlamentarne skupštine raspravljati o svim zakonima i drugim aktima koji su uslov za prijem BiH u Vijeće Europe i zakonima i drugim

aktima iz Madridske deklaracije koji su u nadležnosti Predstavničkog doma Parlamentarne skupštine BiH.

ZA navedeni prijedlog glasalo je 9 poslanika, od 25 prisutnih u vrijeme glasanja.

S obzirom da prijedlog nije dobio većinu prisutnih, dalja procedura glasanja nije ni obavljena.

#### **b) Informacija o Odluci Ustavnog suda BiH po tužbi tada zamjenika predsjedavajućeg Predstavničkog doma**

Predsjedavajući Mirko Banjac napomenuo je da su poslanici dobili Odluku Ustavnog suda BiH, kojom se utvrđuje da određene odredbe Zakona o Vijeću ministara Bosne i Hercegovine i ministarstvima Bosne i Hercegovine nisu u saglasnosti sa Ustavom Bosne i Hercegovine. Podsjetio je na obaveze koje iz te odluke proizilaze za Vijeće ministara i Parlament Bosne i Hercegovine.

U diskusiji su učestvovali Zlatko Lagumdžija, Mirko Banjac, Halid Genjac, Adnan Jahić, Nikola Špirić, Alma Čolo, Ibrahim Spahić.

Poslije diskusije, na prijedlog poslanika Zlatka Lagumdžije i Alme Čolo, usvojen je sljedeći zaključak:

Obavezuje se Vijeće ministara da za sljedeće zasjedanje Predstavničkog doma Parlamentarne skupštine BiH pripremi poseban osvrt na provođenju Odluke Ustavnog suda BiH u pogledu neustavnosti Zakona o Vijeću ministara BiH i ministarstvima BiH, te da do kraja oktobra 1999.godine dostavi Predstavničkom domu Parlamentarne skupštine BiH nacrt zakona o izmjenama i dopunama Zakona o Vijeću ministara BiH, usaglašen sa Ustavom Bosne i Hercegovine.

Za navedeni zaključak glasala su 24 poslanika, a 3 su bila uzdržana.

#### **c) Izbor člana Komisije o administrativnim pitanjima**

Predsjedavajući je pročitao dopis Kluba poslanika Hrvatske demokratske zajednice, kojim su predložili da se u Komisiju Predstavničkog doma o administrativnim pitanjima, umjesto pokojnog Joze Leutara, izabere poslanik Ana Havel.

Poslanici su jednoglasno prihvatili prijedlog Kluba poslanika Hrvatske demokratske zajednice, pa je gospođa Ana Havel izabrana za člana Komisije o administrativnim pitanjima.

Ovim je zaključena 5. tačka dnevnog reda.

#### **Ad - 6: Poslanička pitanja i odgovori**

Predsjedavajući je konstatovao da je do ove sjednice stigao samo odgovor na pitanje poslanika Abdurahmana Malkića, na koje poslanik Malkić nije imao primjedbi.

Na sjednici su postavljena sljedeća poslanička pitanja::

- IBRAHIM SPAHIĆ postavio je pitanje kada će OSCE, odnosno g. Robert Beri omogućiti da Ustavno-pravna komisija Predstavničkog doma ima na uvidu Izborni zakon i da li možemo od OSCE-a odnosno g. Berija dobiti odgovor kada će ovaj zakon doći u proceduru?

- Predložio je da se u Parlamentu Bosne i Hercegovine pokrene inicijativa za amandmanske izmjene Ustava Bosne i Hercegovine i naglasio da će Sekretarijatu Parlamentarne skupštine dostaviti obrazloženje ove inicijative.

- NIKOLA ŠPIRIĆ pokrenuo je inicijativu da nadležni organi u Bosni i Hercegovini povedu računa da se zaštite autorska prava Dušana Šestića, kompozitora Himne Bosne i Hercegovine.

Deseta sjednica završila je rad u 16,15 sati.

Magnetofonski snimak sjednice čini satavni dio Zapisnika.

PREDSJEDAVAJUĆI  
PREDSTAVNIČKOG DOMA  
**mr. Mirko Banjac s.r.**